

四庫全書

史部

欽定四庫全書

欽定平定臺灣紀畧卷六十

五月十六日

丁丑

福康安鄂輝魁綸徐嗣曾同奏言

臺灣戍兵向由內地各營分撥換班但郡屬廳縣地勢廣濶生聚日繁照額酌留一半即於本處募補既免往來調換遠涉海洋而遇有戍兵缺出隨時即可補額不致日久曠懸閭里壯丁又得以食糧充伍於生計尤為有益查戍兵就地召募以日

前而論自應先儘義民挑補惟義民本屬編氓因
值逆匪肆擾各村莊自為聚集藉以保衛鄉閭雖
帶同打仗守城亦知奮勇究因軍紀全未曉諳不
能十分得力若遽令充伍教練仍復需時屆今賊
匪甫平汛防均關緊要以未經訓練之兵撥令防
禦終不相宜且臺灣本無土著大約漳泉兩府之
人居多既在本地募補則凡係廣東及漳泉民人
自應一併挑補方足以示平允計內地換防兵內

原派陸路漳泉各營二千餘名而水師兵丁除閩
安數營外悉係漳泉之人今在臺灣招募一半戍
兵以閩粵民人均勻挑補應募漳泉兵四五千名
其新增兵丁一千二百名招募一半又應募漳泉
兵四五百名即將應派漳泉陸路各兵悉行停止
而以就地招募及換防水師兵丁統算籍隸漳泉
者已及大半似屬非宜前奉

諭旨令將漳州兵丁在泉州村庄防守泉州兵丁在漳

州村庄防守互相稽察查臺灣民人多係內地無
藉游民渡洋覓食其中強健者不安本分武斷一
方名為羅漢脚若以充補營兵則逃伍生事之弊
勢所必然其有眷屬身家之人即使情愿食糧各
有室家繫戀不能將南路者派往北路村居者派
往城中各令遠離鄉井若即附近村庄易地防守
又恐因平日小嫌藉端滋事察看粵東漳泉各庄
情形均屬相同雖閩省內地營兵亦非勁旅但究

係入伍有年技藝均所諳習自較新募者為優且
可使籍隸漳泉兵丁不致多於他處因地制宜似
亦控制海疆之道臣等於內地征兵內詳加挑選
照依戍兵額數令其頂補分派異籍各庄互相防
守不致與本地民人通同一氣再常青將義民挑
補新兵四百餘名一時權宜辦理不能詳加揀選
茲臣等公同挑擇不堪充伍者甚多伊等隨征一
載若此時概行裁汰未免心存缺望因就其中稍

有勞績者酌挑一百八十餘名漢仗均屬可觀交
營管束差操其餘情願歸農之人酌加賞賚俱行
散遣所有存留各兵仍俟將來陸續出缺仍以戍
兵補額以歸畫一至臺灣熟番向化日久此次賊
匪滋事岸裡社茄藤社霄間社番民打仗殺賊頗
為出力此項熟番多在沿山居住向來戍兵駐守
地方佈置固為嚴密但近山一帶道里遼濶番社
交錯稽察究屬難周今若招募熟番設立屯丁雖

不能遠離本社亦可在相近地方與營伍互相聯絡實於巡防有裨惟是兵額糧餉俱有定制未便於額外招番致滋繁費查臺灣近山平埔本係荒蕪之地民人開墾名為埔地臣等帶兵入山搜勦查看南北兩路如集集埔水沙連國信埔小楠仔仙枋寮等處彌望良田已成熟業其餘堪以開墾荒地尚多應即於此項埔地內撥與番民自行耕種毋庸另給糧餉仿照屯田之例將壯健熟番挑

作屯兵設立屯弁以埔地之畝數定屯地之多寡
計數目可得四五千入田畝漸闢人數尚可增多
番性樸實強壯能嫻技勇可期得力無事則各力
田疇防守隘口如有越界滋事民人及逃竄盜賊
匪類皆可派令緝捕所有撥給該番丁等埔地令
其自行開墾照臺灣番田定例概免陞科以示體
卹再臺灣地方民俗倣玩賭博成風一切作奸犯
科皆從此起自逆匪滋事以來民人等遷徙流離

不遑寧處其未經蹂躪之處亦俱保庄守城充當
義民無暇賭博及至地方平定恐其故智復萌屢
經示禁嚴飭查拏遇有賭博隨時懲治已不敢公
然聚賭到郡後復嚴督文武員弁日夜輪查經派
委巡查之都司額爾亨額馬元勳訪聞水仙宮口
民人許班家內約同許高等夜間私賭該員等當
即改裝往拏許班喊同孫嚴拒捕兇毆並用菜刀
劃傷額爾亨額手指旋據該員等拏獲解送當此

嚴禁之時尚敢私行聚賭公然拒捕情屬可惡若非立置重典不足以儆兇頑而懲惡習隨於審明後將許班一犯即行正法其餘在場人犯悉予枷號三個月示衆至孫嚴係幫同拒捕之犯非僅在場賭博者可比現用重枷示衆期滿擬發新疆給種地兵丁為奴邇日各處民人聽聞許班伏法咸知畏懼賭風頓為斂戢地方極稱寧謐又潰兵等蒙法外施仁貸其一死是以鳳山嘉義等處潰回兵

丁經常青奏明收伍在案續有大墩潰兵二十一
名投赴藍元枚軍營尚未收伍臣等覆加查核該
兵丁等當賊匪等猖獗之時冲散後不肯甘心從
賊即行間道脫歸與鳳山潰回之兵相同自應一
例辦理惟王得賜一名因賊匪逼令喂馬即行奪
馬騎回後隨同官兵打仗出力毋庸追究外其吳
勝得一名曾經為賊服役未便因早為投出一概
從寬應發往伊犁充當苦差至於逃匿日久潰兵

直至賊匪將次撲滅之時始行投出仍當從嚴究辦臣等自統兵進勦以來陸續投出潰兵六十五名訊據王文彪等三十一名供係被賊匪掣去服役並未隨賊打仗抗拒官兵但各兵久陷賊中甘為服役不思及早投出較之吳勝得尤為可惡審明後俱已按名正法又陳選得三十三名俱係冲散後在義民村庄藏匿因道路梗塞不能投出實無從賊情事應請貸其一死發往伊犁充當苦差

至潰散無着人數今已分晰查明彰化嘉義淡水
鳳山各處及崗山營汛被賊攻陷共潰散無着戍
兵八百八十二名郝壯猷在鳳山失事共潰散無着戍
兵八十九名征兵一千二百九十二名魏大斌等
赴援嘉義千總陳邦材等隨同前往潰散無着戍
兵七十一名楊起麟邱能成隨蔡攀龍再援嘉義
潰散無着戍兵三十八名所有赴援嘉義兵丁因
賊匪四面圍裹兩次陣亡共二千二百四十二名

故潰散之數較陣亡為少竊思此項潰兵未曾經歷行陣當賊匪肆擾之時紛紛四散帶兵將弁各不相顧內有被賊戕害者該將弁等因未親見不敢冒昧開報亦俱歸入遺失數內臣等自進勦以來投出者祇有王文彪等六十餘名此外並無掣獲潰兵惟恐濱海地方港汊叢襍乘此撤兵之際或有夾帶潛逃隨經飭派妥幹員弁分赴各海口嚴密盤查並令帶兵內渡各將領等留心稽察據

川省都司張占魁拏獲潰兵陳得喜一名供係被賊
拏去服役事後思欲逃回內地訊明亦即正法餘
皆稟報並無潛竄現在全郡平定零星逆匪村庄
尚不敢容留此項潰兵多至二千餘名似難全行
藏匿而福州等府兵丁與臺灣土音迥異更屬易
於辨識且疊經訊據拏獲賊匪供稱攻陷城池及
攔截援兵時凡係失陷兵丁多被戕害賊首林爽
文自誇強橫曾屢次張掛偽示告知夥黨賊目莊大田

亦有攻陷鳳山時殺害官兵一千餘名之供均可
為潰兵被害之一証但行兵紀律不可不嚴該處
兵丁等既無陣亡實據則從賊偷生之事難保必
無仍應通行查緝從嚴究辦已飭造清冊移咨李
侍堯及隣省各督撫嚴飭地方官一体上緊查拏
飭行粵省臺灣各海口員弁認真盤詰於何處拏
獲即於何處審明分別嚴辦以為臨陣潰逃者戒
又據各委員及義民首等陸續報獲賊目張語秀

鄧理黃岱莊田林藉洪服陳信陳光珽溫基王喜
陳天運洪湖生十二名逆匪林顏領等九十八名
隨經核明將有名逆匪提訊或係隨賊打仗或係
聽從糾約擾害村庄當押赴市曹正法其淡水彰
化等處距府較遠所有報獲餘匪即飭該廳縣訊
取切供詳報確核即於該處令同營員正法示衆
現在查對案內指緝各犯未獲者已屬無幾又林
典文偽印業經搜獲莊大田亦有偽刻木印一顆

茲據義民潘瑞鳳在南路大湖地方田邊溝內檢
出係洪號輔國四字應與林興文偽印遇便一併
解交軍機處銷燬至臺灣水營各營戍兵建有兵
房給與居住其衝途要隘設兵巡察之處亦俱安
設塘汛墩臺以聯聲勢乾隆三十七年鎮標三營
兵房因年久間有倒塌經原任總督鍾音具奏勘
估興脩三十九年二月工竣其南北路各營兵房
亦動支間款銀兩脩葺蓋造並未全竣海濱沙土

鬆浮颶風時發各處舊存兵房塘汎漸次坍塌即
新脩處所亦多傾圮並不隨時粘補延至四十九
年全行倒壞歷任鎮道各員均未詳報辦理經富
勒渾屢次札行嚴查始據該鎮道查明應脩兵房
營汎一千三百七十餘間詳請脩理偏僻汎地亦
未議及富勒渾以所估工料浮多駁令再行確勘
雅德接任後因鎮標及各營脩理歷年未久何至
坍塌如此著再加確勘方准造銷文稟往來動稽

時日直至五十一年地方官自應賠脩甫將鎮標
兵房建蓋十餘間即值逆匪滋事復又停工臣等
自進兵以來沿途親見塘汛墩臺僅有舊時基址
依稀可辨留心察看情形其被賊人焚毀者尚少
竟多係平時坍塌統計全郡兵房營汛二千四百
餘間除安平左營尚存十間鎮標三營尚存十餘
間此外房屋並無一瓦一椽以致兵丁等藉稱無
可棲身在外散處任意營生貿易置操防於不問

經富勒渾雅德屢次嚴飭而地方文武各官恃有
重洋之隔一味支延往返駁查動至經年累月此
種外省惡習已屬可惡况臺灣孤懸海外營制尤
關緊要乃敢積久玩悞任意飾延實堪痛恨自應
分別賠脩現在戍兵全數挑齊分撥各營未便令
其露處若令租賃民居又恐陷從前包差陋習臣
等公同商酌先令支架帳房搭蓋草寮飭該兵等
按營分汛居住防守臣徐嗣曾照例估計立即借

動款項會同普吉保上緊購料興工仍查明三十
八年以後臺灣鎮道府廳縣歷任各員在任久暫
各部分別着追歸款再各營原設兵房並未按照
兵數建蓋以致有兵多之處營房不敷居住而兵
少之處房屋轉有空間總由從前添兵設汛時未
能悉心經理以致多有叅差此次另行脩建臣徐
嗣曾會同普吉保詳查兵數多寡相度地勢妥為
辦理俾無盈絀之虞再查有福建閩安協左右兩

營都司二缺廣東惠來營遊擊一缺應行揀補又
澄海協中軍都司一缺前以惠州協右營守備麥
瑞奏陞今麥瑞業經掣補三江口都司其澄海協
都司員缺需遴請補用以上遊擊都司共計四缺
均應於打仗出力人員內補用第查軍營出力人
員俱已陸續

奏請陞補其餘閩粵官員已帶該省兵丁分起配船
內渡臣現已分別移咨李侍堯孫士毅查照即於

各營照例揀員題補奏入

上命軍機大臣傳諭福康安李侍堯魁綸徐嗣曾曰前因臺灣戍守兵丁向內地各營分撥前往遠涉海洋紛紛更調且義民出力者甚多是以諭令福康安等於辦理善後時察看情形或酌留一半即在臺灣募補以歸簡便原係朕厯念海疆思慮所及即行隨時指示並非謂必當如此辦理今據福康安等體察輿情若先儘義民挑補既恐未諳軍紀不能得力又恐

招募漳泉之人太多請於內地征兵內詳加挑選照依戍兵額數令其頂補自屬實在情形原不妨據實奏明毋庸拘泥前旨辦理其熟番既可招募並請將集集埔等處空餘田地撥給番民自行耕種仿照屯田之例將壯健熟番挑作屯丁設立屯弁管束之處自應如此辦理至臺灣無藉游民不安本分武斷一方名為羅漢脚此等惡習最為可惡與四川咽喉匪犯無異現經大加懲創之後不可不實力查拏隨時

嚴辦務使奸徒斂跡盡絕根株不復有此項名目方為妥善此事福康安起程後交李侍堯等嚴飭該處鎮道及地方文武官弁認真查察隨犯嚴懲以期海疆永靖毋得日久玩生致干咎戾又查辦賭博拒捕一案該處甫經大兵懲創之後福康安等尚在臺灣大兵未盡全撤而不法奸民已敢肆無忌憚拒捕傷官將來大兵全撤後此等奸民更復何所儆畏尤不可不認真嚴辦此事福康安起程後亦着交李侍堯

飭屬嚴查隨時懲創毋得稍有疎縱

上又諭內閣曰潰兵等雖據訊明因道路梗塞不能投
出尚無從賊情節但該兵等派出隨征於遇賊打仗
時即紛紛潰散不顧主將冲散後又不即時投出轉
在村莊藏匿雖與曾經從賊者情罪有間但僅發伊
犁充當苦差不足示懲着改發伊犁兵丁為奴以昭
炯戒

同日福康安鄂輝魁綸徐嗣曾同奏言臺灣澎湖

兩處額設水陸官兵例由內地各營更調防戍自
逆匪滋事以來陣亡缺額者甚多因在行軍之時
數目未能清查均未調撥充補班滿者亦未撤回
臣等初抵軍營即令柴大紀將戍兵數目詳晰查

報維時道路甫通戍兵分撥各處未據查開實數
臣等以柴大紀廢弛營伍或係兵丁本有缺額一
時難以登覆恐將傷亡遺失數目任意加增希圖
掩飾因於撤兵回郡後傳集各營將弁及帶兵各

員詢問並調齊檔冊文卷逐一上緊檢查此項換
防兵丁自內地撥來俱係實數總因臺灣營伍廢
弛兵丁多不差操以致存營兵少其實並無短缺
通計各營戍兵實在陣亡傷亡無着病故革退等
項及拔補弁目遺缺共計未補兵丁四千八十五
名其餘現存兵內有班滿應換者四千四十九名
挑出班雖未滿傷殘病廢者二百七十二名所遺
各缺除將派來換班尚未歸伍兵四百四十四名及

常青招募新兵內酌挑一百八十七名頂補外其餘均應挑補若照例咨調內地營兵往返重洋動稽時日應即於征兵內挑留補額該兵丁等器械齊全以原配器械隨帶巡防更為便易臣等於撤兵時即將內地壯健征兵逐一挑選其李侍堯所募新兵漢仗均多可觀亦擇其隨同打仗出力者一併挑留統挑補舊設戍兵額缺共七千八百八名又挑補新增汛防戍兵一千二百名惟向例臺

灣戍兵係由福建通省水陸各營內勻派每營皆有定額到臺灣後自當各按原營安設以資約束乃向來並不按營編伍率以一營之兵分作數處零星派撥兵弁不能相識尤屬難以稽查此項挑留之兵係就現在征兵內選擇營分本不能齊全又祇擇其年力精壯者留補每營挑出之處或多或寡並未拘定例額其安設地方俱係指定某營之兵派往某處即歸原營官弁管轄不致如從前

參差混淆所管備弁就近點驗差操更屬得力嗣後即照新定章程俱令按營分設所有此次挑留兵丁換防年限均以調到臺灣之日為始照例扣算辦理至陣傷亡故戍兵今已查明定數該兵丁等所出內地本營之缺咨明李侍堯將上年新募兵丁及換回各兵內挑補其有傷殘病廢者即可酌加減汰如此則兵數適符原額而新兵補缺迅速亦不致多糜費糧餉再臺灣戍兵向係內地各

營挑撥更換應得月餉銀俱在臺灣支給其本籍
眷口於該兵餉銀之外每名每年給銀三兩零米
一石二斗以資養贍今新添戍兵一千二百名計
需養贍銀三千九百餘兩米一千四百石換防時
尚有應給往來盤費銀兩若再將新添戍兵於內
地召募又需在常額之外多增餉銀一萬八千餘
兩米四千三百餘石是以祇就內地各營通融抽
撥毋庸另行添設核計內地各營現兵五萬餘名

調出兵一千二百名於十分之中尚不及一分之
半似與營制無碍再臺灣吏治廢弛奸民無所顧
忌以致釀成逆案此番整頓之後丞倅州縣等官
如有必需添設即應逐一酌籌詳晰具奏但體察
閩郡情形原設廳縣分治地方經制均為妥善果
能盡心撫字綏輯得宜自可永臻寧謐若多設官
員不能盡得其人轉於地方無益惟分駐佐雜官
員各有稽查奸匪之責其中今昔情形不同自應

悉心調劑量為改移即如南路鳳山縣城現請移
建埤頭街其舊城地處海濱議以鳳彈汎弁兵移
駐應將下淡水巡檢一員移至鳳山舊城駐劄至
下淡水在東港上游南達水底蔡枋蔡最關緊要
應將阿里港縣丞一員移駐下淡水其阿里港地
方即與新移鳳山縣之埤頭街相近一切均歸知
縣管理又北路斗六門地當衝要原設巡檢一員
官職太卑不足以資治理應於該處添設縣丞一

員歸嘉義縣管轄又大武壠山內村庄甚多最為險要現已安設汛防撥兵駐守亦須文員彈壓應將原設斗六門巡檢一員移駐大武壠其隨帶弓兵衙役毋庸另議至添設縣丞一員應增俸薪役食並移建添建衙署及鑄給印信各事宜臣徐嗣曾逐加查明照例分別題咨辦理再向例調任臺灣各員三年俸滿即行調回內地該廳縣身任牧民責成綦重若在任未久一切風土人情尚未諳

熟竊計仄期將屆鮮不苟且自安祇圖塞責地方
人民亦以官長不久去任未免心存玩狎甚有不
肖官吏不以涉險為慮惟知貪利營私延至滿任
即可卸責而去即有認真辦事之人正資清釐整
頓而俸秩已滿遽易生手亦不能竟其設施查臺
灣道府向係三年俸滿四十九年改為五年應請
將各該廳縣照道府之例一體改為五年報滿俾
得多歷歲時盡心民事倘敢日久玩生廢弛公務

請交巡視臺灣之將軍督撫等就近考核從嚴叅
究再查降番弁目僱拉浞浸兩處額設土守備六
員土千總九員土把總十六員土外委四十六員
此次隨征臺灣派來土弁等帶領降番甚為出力
今降番業有定額均照屯練兵丁之例加給日餉
所有僱拉浞浸土弁等請援屯練土弁定例分別
賞給錢糧至臺灣原定營制本無馬兵雍正二年改設
馬兵三百名嗣於雍正七年因籌添塘汛守兵將

馬兵裁撤是以全郡戍兵盡係步糧即官弁亦無
馬匹日久相沿騎射均不講習此次進剿逆匪臣
等率同巴圖魯侍衛章京馳驟往來奮勇衝殺最
為賊匪所畏屢次克捷實藉馬力為多茲當更定
營伍之時若請照前例改設馬兵三百名彈壓地
方似足以昭嚴肅馳報緊急公事亦可不致稽遲
於營伍殊為有裨第查臺灣地方平原寬廣處處
皆有水草原非不能畜牧惟因天氣過於炎熱從

前裁減馬兵案內即有難於喂養之語臣等帶兵
勦匪適值冬末春初水土平和馬匹頗能臙壯若
至夏秋蒸溽之時養馬究恐非宜再四籌酌先於
巴圖魯侍衛及各官員交回馬匹內酌留一百匹飭
交臺灣鎮總兵照例給發馬乾試養一年如果喂
養得力俟閩省督撫巡察臺灣之便就近查驗據
實奏

聞再於臺灣鎮標改設馬兵一百名北路協標改設馬

兵一百名作為定制班兵更換留馬易人所有應
需馬匹即在內地各營抽調除延平建寧福州長
福興化泉州城守等營地當孔道毋庸抽調外其
餘偏僻標營均有馬一百三四十匹至一百七八
十匹不等每營不過調撥十餘匹即可足二百匹
之數並將馬兵數目於戍兵內改撥核計糧餉馬
乾均無增減海疆營伍防範更為周密再臺灣一
郡負山面海外控澎湖地勢袤延幅幘廣濶其間

要隘甚多原設臺灣澎湖水陸兵丁一萬二千一百七十六名除水師兵四千一百六十三名外南北兩路共兵八千零十三名分撥防汛佈置已為嚴密惟是今昔情形畧有不同數十年來仰蒙

聖澤濡涵生齒繁盛從前荒廢之地日闢日增西至海濱東至山麓村落相連野少曠土自大雞籠以至枋寮南北綿亘一千餘里里數較內地加倍不啻有二千餘里之遙近山一帶地方如大里杙水沙

連大武壠水底藔等處最稱險遠溪深嶺峻僻徑
紆迴外則番社環居內則流民雜處向因人迹罕
至未設汛防而各縣城內兵力亦覺稍單不足以
資防衛今擬於各處緊要地方及通衢大路每處
添兵一百數十名至二三十名不等並將各海口
水師量為移撥務使分派得宜聲勢聯絡駐守足
資彈壓會哨亦易稽查海外巖疆庶可永臻寧謐
查臺灣郡城原設鎮標三營城守左右軍一營除

去分防之數存城兵丁尚有二千七百餘名足稱重鎮毋庸另議增添其北路彰化縣城原設兵一百一十四名該處地當衝要係副將大員駐劄兵力較少擬添兵一百八十六名以足三百名之數縣城迤東之八卦山地勢最高可以遙瞰城中現擬於山上設立卡座應添設兵四十名外委一員帶領駐守所有山旁通往柴仔港烏日庄犁頭店大里杙要路均可藉以稽查大里杙係逆首巢穴

雖經大兵勦洗淨盡城堡亦已燬除但係扼要之地直達彰化南北投又與內山相近應添設外委一員兵丁五十名水沙連與番界交錯山嶺重疊地方更為遼濶應添千總一員兵丁一百名在集埔駐劄嶺頂地方接壤水沙連而附近之虎仔坑尤為奸宄出沒之地應添設外委一員兵丁三十名稽察更為周密又磺山地產硫磺向係封禁逆匪滋事時曾經李侍堯派守備羅禮璋帶兵看

守該處山嶺重疊逼近海岸山外砲臺塘汛設兵
本少且距礮山道里太遠稽察難周查石門地方
係礮山出山要路又有港口通洋應於該處添兵
三十名外委一員防守又中路一帶嘉義縣城原
設兵三百七十七名係北路左營守備帶領弁目
駐守該處為全郡適中之地最關緊要添兵一百
二十三名以足五百名之數並擬改設都司一員
其原設守備一員即移於斗六門要隘駐劄查斗

門四達通衢向稱險固賊匪佔據一載始行攻克
今既將守備移駐該處原設之千總一員兵五十
名不敷防守應再添外委一員兵一百三十名即
歸新設之都司管轄以資控制大武壠村庄甚多
路徑叢雜外霄間庄在大武壠山內本縣庄為西
北面入山要口應設千總一員添兵一百名駐劄
外霄間庄再添外委一員分出兵丁二十名在本
縣庄防守元長庄近海地方寬廣應設外委一員

添兵二十名大埔林西螺鹿仔草等處均係要地
額設弁兵太少難資防守即平時稽察村庄緝拿
奸匪亦不敷用應於原設弁兵之外大埔林添設
兵十五名外委一員西螺添兵二十名外委一員
鹿仔草添兵十名以壯聲勢其大排竹蔴豆庄係
嘉義縣至府城大路三坎店茂功庄係大武壠西
南面要口應於大排竹添兵二十名外委一員蔴
豆庄添兵三十名外委一員茂功庄添兵二十八

名外委一員三坎店祇添兵二十名毋庸另設汛
弁即歸大武壠千總管轄又南路一帶崗山汛原
係守城左軍守備千總帶兵一百三十五名駐守
再添四十五名原設備弁毋須更易鳳山縣城原
駐叅將一員千總把總外委共八員兵四百六十
二名今縣城改建埤頭地方將弁均未移駐毋庸
另行增設惟添兵三十八名以足五百名之數其
鳳彈一汛即在埤頭附近應行裁減將該汛原設

兵丁內撥兵一百一十六名添設千總一員移駐鳳山舊城在擬建卡座之龜山上安設鳳山極南之水底寮地方最為險僻應移撥鳳彈汎原設守備一員把總一員兵一百名仍再添兵五十名在該處駐守其番薯寮係近山要隘自大武壠山內通往鳳山小路皆由該處經過應添兵二十名額外外委一員以資防範而重巡防統計此次添設都司一員千總三員經制外委十四員額外外委

二員兵丁一千二百名除添設都司應行揀員調補其弁目兵丁均照例於福建內地各營酌量抽撥換防用歸簡易查閱省額兵通共六萬三千一百一十九名扣去臺灣戍兵一萬二千一百餘名內地當存兵五萬九十餘名通盤計算再抽出新添戍兵一千二百名分在各營調派所撥亦屬無多內地兵丁尚不致於短絀但各營兵數多寡不一應如何分別衝僻地方酌量分撥之處容俟回

至泉州與李侍堯面加商酌再行會摺具奏再查安平協水師原設三營駐劄安平為海疆要隘但該處內依郡城外接澎湖聲勢已屬聯絡駐兵未免稍多惟北路鹿仔港最為緊要口岸係臺灣水師左營汛地原駐備弁兵丁不足以資巡守應將該協左營內遊擊一員千總二員把總二員外委三員額外外委三員兵丁三百七名戰船九隻移駐鹿仔港即以原駐鹿仔港之守備一員把總二員

兵丁一百一十五名戰船二隻移駐笨港以笨港
原駐之把總一員兵丁七十五名戰船二隻移在
原未駐兵之新店海口其安平協水師右營之東
港一汛原設把總一員兵丁一十五名亦覺過少
應再於該營內撥兵三十五名添設該處如此一
轉移間沿海營汛仍歸本營管轄毋庸增設新兵
而於緊要海口哨探巡防亦可倍加嚴密奏入
上從之

欽定平定臺灣紀畧卷六十

欽定四庫全書

欽定平定臺灣紀畧卷六十一

五月十七日

戊寅

上命軍機大臣傳諭李侍堯曰向來臺灣換班戍兵籍
隸漳泉兩處之人居多此次逆匪滋事亦由漳泉民
人不和以致林爽文乘間滋擾而防守戍兵俱因係
屬同鄉互相徇隱此次從賊者漳州民人雖多但其
中泉州民人亦非盡屬義民亦有隨賊黨抗拒官兵

者現在臺灣換班兵丁若僅在督撫標及福州協陸路提標等營兵丁內挑補是督撫兩標充伍食糧者當係福州民人而陸路提督駐劄泉州其兵丁自多係籍隸本地者調往臺灣仍係漳泉之人居多恐將來日久未免勾結滋弊若竟將漳泉兵丁概置不調又恐轉致猜疑更屬不成事體不若於福建通省內如興化延平建寧邵武等處各營內酌量均勻派撥而漳泉兩處兵丁亦攤入其中使該兵丁等知挑補

換防無分畛域自必不生疑怯此係該督分內優為
之事務須行所無事或告以離別家室遠涉重洋未
便獨令漳泉兵丁向隅自當均勻調撥以歸平允之
言使之知是體恤不生猜畏如此不動聲色潛移默
化庶於撫綏防範兩有裨益方為妥善並令記此旨
歷任總督永遠留心再黃仕簡帶兵渡洋並不奮勇
勦賊安坐郡城因循株守以致賊匪蔓延罪無可逭
朕因其年老多病免其一死釋放回籍而逆匪滋事

年餘一切軍餉費用不貲皆黃仕簡因循貽誤所致
是以前經傳諭李侍堯於黃仕簡名下罰令繳出銀
二十萬兩以備賠補軍需之用何以至今未據覆奏
著李侍堯查明此次所用軍需共有若干黃仕簡原
籍財產是否罰繳裕如之處即行迅速覆奏

二十一日

壬午

上命軍機大臣傳諭福康安李侍堯徐嗣曾曰礮斤採
自山中如果開採時毫無透漏則該省民人製造花

爆以及打取牲畜配用火藥又從何而來即此次賊人鎗砲內用火藥不少豈盡由搶奪所得可見開採磺山雖派員駐劄仍不能保無透漏此事惟在該督撫等平日嚴加查察總期先於軍火無虧即或民間舖戶之所需不能悉行禁絕亦當防其太甚至臺灣地方向產磺斤前據逆犯林爽文供稱將牆上年久石灰煎煮成硝在北路生番山裡私換硫磺配作火藥等語生番山裡既產硫磺則奸民不但可以向其

私換或幫同偷採亦未可定現據福康安奏將臺灣民間私用烏鎗繳回銷燬改鑄農器而私換硫磺及偷採之弊尤應嚴切查禁着福康安務飭該地方官嚴密稽查勿任仍前疎縱並著李侍堯徐嗣曾各於內外時刻留心查察不得日久生懈滋弊生事

二十三日

甲申

李侍堯奏言拿獲張破臉狗研鞠據

供向無行業以開場窩賭為生於四十六年夏間有廣東人趙明德陳丕陳棟三人曾到該犯家內

聚賭趙明德等告以在廣東曾入天地會已傳有
四五十人勸令亦入此會該犯即行聽從及詰以
結會後有何好處據供一入此會就有同會之人
相護開賭便不怕人攪擾其傳授暗號只是喫茶
喫烟俱用三指如有人問及有無兄弟答左右俱
有兄弟便知是會中人該犯又轉傳同縣人鄭成
徐炎及平和人鄭詩張普四人至詰其高坑菴馬
坑廟等處俱係傳會之所據供該處地方俱因趙

明德等到過即有入會者實無另有為首之人訊
以趙明德等年貌住處據供趙明德係潮州府大
埔縣人在東門外下寮鄉住年約五十餘歲陳丕
陳棟亦係大埔人年俱約三四十歲其住居細址
未曾問得至陳彪實不知係何處人四十八年趙
明德復來家內住宿多日後回廣東久未再到雲
霄實不知在何處嚴烟亦曾到過該犯家內等供
查該犯所供情節核之福康安訊問供詞並臣前

獲會匪審究情形大概相同趙明德陳丕陳棟三犯現在廣東大埔縣地方臣已飛咨兩廣督臣孫士毅嚴密查緝並飭漳浦平和等縣查拿該犯所傳之鄭成等到案再行質訊奏入

上命軍機大臣傳諭李侍堯孫士毅曰據李侍堯所奏是天地會竟係起自廣東傳至福建張破臉狗供出之趙明德等三犯為首先在閩傳教之人必當嚴緝務獲著孫士毅即速飭屬嚴密查拿按名務獲勿任

兔脫漏網其鄭成等四犯並著李侍堯飭拿到案質訊明確分別辦理

上又命軍機大臣傳諭李侍堯徐嗣曾曰各省地方官建立生祠非違道干譽即倚勢力賄求最為陋習必應飭禁此次特令建立建勲諸臣之生祠乃因臺灣地隔重洋民風慄悍逆匪等糾衆滋事肆行不法福康安等帶兵前往勦捕未及三月即已擒渠藏事該處民人經此一番懲創暫知斂戢第恐日久復忘是

以許在彼建立福康安等生祠明示武威使之怵目
儆心望而生惕此為綏靖海隅因地制宜起見

但福康安辦理善後各事宜完竣即須回京且伊亦
無自辦生祠之理自應該督等承辦何以未據李侍
堯徐嗣曾奏及著再傳諭該督等止須遵照前旨於
臺灣郡城嘉義縣兩處建立生祠至此次帶兵大臣
內惟福康安海蘭察鄂輝普爾普舒亮功績較著職
分亦大應行入祠祠內設立木牌書寫伊五人官階

其餘各員威望俱輕未便一體列入徐嗣曾現在臺灣此事即交與該撫妥辦從前該省耿藩肆逆時范承謨效忠殉節曾勅建祠宇非同創設該撫可仿照辦理

上又諭內閣曰常青於柴大紀貪黷不法一案徇隱不奏前曾降旨將伊革職交福康安審訊經福康安奏請交部治罪固屬咎由自取但念常青由將軍簡用總督在任未久即值臺灣逆匪滋事非富勒渾雅德

歷任年久因循貽悞諱飾袒庇者可比其到臺灣後
於柴大紀種種劣蹟固易訪查但彼時正值辦理軍
務匆促其不即查叅之咎尚屬可原且伊年逾七旬
帶兵駐守郡城保護無虞其功過尚可相抵常青著
加恩免其交刑部治罪俟到京後候朕酌量加恩另
降諭旨朕辦理庶務一秉至公罪之輕重固視其人
之自取而於功過相抵之處亦必斟酌其平不肯稍
有畸輕畸重即編戶小民尚不使一夫冤抑何況封

疆大吏轉不為之經意乎富勒渾雅德亦當慚服并自知悔懼也

二十八日己丑孫士毅奏言上年接准閩省知會有

天地會匪起於洪二房和尚及朱姓等語因並無州縣名色當即會同撫臣圖薩布密飭通省遇有洪姓形跡可疑者俱行徹嚴嚴查解報旋據查出洪姓和尚數名經臣逐一訊供實與天地會匪一無交涉惟查有嘉應州法名洪朗洪科二僧與俗

家朱姓十七八歲僧人立嵩同住靈峯寺內當即將三人嚴切訊究堅不承認臣於抵潮後復委惠潮嘉道圖畢赫親往勘查該寺雖離城三十餘里烟戶頗多並非偏僻地方訪訊附近村隣俱稱寺僧耕種焚修從未出外亦從無往來交接之人並據族隣鄉保出具聯名甘結臣以姓名適合未便遽信其必無為匪情事將闔寺僧人七名一併解潮臣親提究詰並察看語言動止俱係樸野山僧

其非起會匪犯實屬可信惟因名姓相符未敢據
行省釋仍發嘉應州收管在案查洪朗洪科兩僧
伊俗家並非洪姓但俱以洪字為名與洪二房之
義適合且有十七八歲朱姓僧人同住雖就臣細
加察訪實與天地會匪毫無影响但恐日久弊生
不法匪徒又以該僧等洪朱名目互相煽惑不可
不防其漸自不應仍留內地臣仍會同撫臣圖薩
布密飭通省務將起會之洪朱二姓正犯跟緝務

獲辦理奏入

上命軍機大臣傳諭李侍堯孫士毅曰趙明德陳丕陳棟
三犯俱籍隸廣東大埔且有住址年貌非若洪朱二
姓尚無的確籍貫住址可比無難尅期弋獲著孫士
毅即速選派妥幹員役嚴密查拿務令全行拿獲毋
致要犯得以遠颺漏網至洪朱二姓正犯並著李侍
堯仍在漳泉一帶飭屬留心訪查務獲毋任兔脫

二十九日

庚寅

福康安魁綸徐嗣曾同奏言提集柴

大紀案內人証逐一嚴訊緣柴大紀於乾隆四十八年十一十二等月前赴南北兩路查閱各營員備辦人夫擡送行李漸至折送酒席下程等項銀數無多亦無一定柴大紀因有舊習即令按營定數繳送統名夫價嘉義彰化北淡水等營每處番銀六百圓竹塹鳳山下淡水等營每處番銀四百圓共計番銀三千圓俱係各營都守以至千把總按照廉俸擬派彙繳內有當時未經收取之處即

留伊弟柴大經在營催取轉交先後巡查四次計
得受番銀一萬二千圓又得受所過廳縣餽送盤
費並折送下程酒席銀兩每員二百餘圓及三百
餘圓不等共取番銀七千三百餘圓又每年收過
各營員生日節禮番銀三千七百餘圓五十年巡
查彰化時副將赫昇額以營員不堪苦累曾向柴
大紀爭論不允都守畏懼總兵仍照數備送現據
巡捕鄭名邦等供吐確鑿又鹿耳門海口例派遣

擊千總按季輪流駐守凡係出入船隻掛號稽查
船戶向俱送給陋規如有例帶米石之外多帶米
糧仍須格外加送管理海口將弁係總兵派管將
所得陋規按季分送總兵春季向止繳送九百七
十二圓柴大紀以春季船隻較多令每月加增番
銀二百圓春季共番銀一千五百七十餘圓夏季
九百七十餘圓秋季九百餘圓冬季九百七十餘
圓尚有鹿仔港海口船隻較少係安平左右將弁

管理每年繳送番銀一千二百圓北淡水通海港
口雖未開設口岸亦有船隻往來該處汛員每年
繳送番銀一千圓以上每年共得番銀六千六百
八十八圓自逆匪滋事以後此項陋規始行停止
計柴大紀任內共收番銀一萬六千七百二十圓
又五十年九月內淡水營經制外委缺出額外
委余登魁托巡捕鄭名邦向柴大紀胞弟柴大經
講定酬謝番銀八十圓轉向柴大紀說明拔補十

二月內南路營並北路左營出有額外外委二缺
守備吳剛代步兵林長春即林上春劉欽懇求柴
大紀允准拔補當經林長春送番銀一百三十圓
劉欽送番銀一百二十圓俱經巡捕鄭名邦帶同
面交柴大紀收受五十年有新拔外委甘興隆因
班滿欲回內地托巡捕鄭英懇求柴大紀早給委
牌送番銀四十圓五十年八月竹塹額外外委缺
出柴大紀將北路中營步兵伍永信拔補得受番

銀六十圓係巡捕高大捷向柴大紀說合轉交五
十一年十二月內柴大紀因步兵柴景山拔補鎮
標左營額外外委令巡捕高大捷索謝柴景山措
備番銀一百二十圓交柴大經轉交收受所得贓
銀除歷年花用並寄回原籍及任所抄出外現今
查出糖行黃梧借柴大紀番銀一千五百圓錢王
慶繳出存換錢文番銀四百五十二圓又總兵衙
門聽差兵丁舊設旗牌管班伴當材官四項頭目

名下兵丁有不親自上班者每月每名出錢三百文至六百文不等雇替當差名為包差交該班目兵收用聽其各自在外貿易營私甚至包庇娼賭並不留心約束該鎮協等標兵房及墩臺塘汎坍塌有年亦不及時修葺四十八九五十等年經閩浙督臣富勒渾雅德疊次札查嚴飭整頓柴大紀於五十一年調任汀州鎮旋仍調回臺灣謁見雅德時面加申飭而柴大紀先後在任仍止應名操

演全不認真倒壞兵房亦未造修完固迨至五十一年十一月間首逆林爽文在大里杙結會抗官聚匪滋事柴大紀適於是月初七日巡至彰化縣經副將赫昇額知縣俞峻稟請派兵查拿柴大紀藉調兵為名於初八起身十二日回至郡城僅令遊擊耿世文帶兵三百名會同知府孫景燧於十六日前赴彰化查緝並不親身前往直至十二月初二日嘉義守備稟報彰化縣城失守柴大紀派

令遊擊李中賜帶兵六百名赴援至初四日下午
自行帶兵出城即在演武廳逗遛不進經永福楊
廷理詢問柴大紀以人夫缺少無人擡送軍裝為
詞藉端支飾永福等復加催促於初五日始行起
身及行至灣裡溪即聞嘉義被陷退回鹽埕橋駐
劄打仗數次剿殺賊匪尚屬出力正月內從鹽埕
橋起身帶同兵民收復嘉義迨後被圍數月多係
文武各員兵丁義民之力及奉到

諭旨令其酌量情形全師而出其時賊匪四面屯聚圍攻勢不能帶同義民家屬突圍他往而城內軍民亦再三懇留不肯令其出城柴大紀因已固守數月又有大兵不日可到隨傳集義民出示曉諭仍前守禦訊問隨同守城之將備及義民首黃奠邦王得祿等所供均屬相符臣等伏思賊匪起事之初柴大紀適在彰化若平日果能整飭營伍則北路弁兵已足調用何難帶領星赴查辦即恐兵數

不數另須派撥接應一面飛檄調取一面親往督
拿乘賊勢未張之時迅速辦理自可立時撲滅乃
竟回至郡城坐守二十餘日之久及帶兵赴援又
復遲滯遷延種種玩悞軍機之罪實無可置辦柴
大紀於臺灣逆匪滋擾之時在鹽埕橋打仗尚為
出力在嘉義守禦亦有微勞但係專閫大員身當
海疆重任平時不思實力整飭乃敢縱容兵丁出
錢替役離伍貿易包庇娼賭兵房塘汎並不及時

修葺任其坍塌營務種種廢弛更復私營網利巡查婪取夫價海口得受陋規甚至拔補外委公然受賄徇私肆行無忌已出情理之外迨至巡查彰化正值逆匪竊發之時又不立即帶兵親往撲捕輒敢退縮回卽觀望遷延以致賊匪蔓延猖獗攻陷城池一載以來未能藏事皆由柴大紀玩視貽誤坐失機宜所致應照例擬斬立決派員解送刑

部請

旨即行正法劉欽林長春即林上春等營謀干進賄拔
弁缺情節甚為可惡除劉欽一犯前以臨陣退縮
業經正法外林長春即林上春照例擬絞監候處
決余登魁杖一百流二千五百里伍永信杖九十
徒二年半守備吳剛代劉欽林長春說合賄求律
應絞候業經陣亡毋庸置議柴景山杖九十甘興
隆杖七十柴大經係總兵胞弟隨同在署不思安
分守已與巡捕人員私相交結干預公事疊次說

事過錢代兄婪賄應發往新疆充當苦差高大捷
鄭英業經正法陣亡應毋庸議千總羅勇把總蔡
開祥充當巡捕於柴大紀婪索之時實未經手且
係賊匪滋事後打仗出力援捕千總亦未餽送夫
價得受包差錢文仍即咨部開復再查臺灣鹿耳
門海口設立文武員弁防守稽查其出口回至屢
門船隻例准載米二百石乾隆三十一年閩浙總
督蘇昌淮部行查議定同知衙門每船收取番銀

三圖武弁取錢一二百文以為辦公飯食之用經戶部奏准遵行在案今柴大紀每年得受陋規至六千餘圓此外如副將及管口文武自必有任何勒索情弊均須徹底根查當即飭調冊檔傳集經管海口各員弁及書吏人等嚴加究訊緣鹿耳門海口安設文武兩館其武館係由總兵派令安平中左右三營遊擊千總分年按季輪流管理凡船隻入口船戶送給番銀三圓出口每船四圓又額

外多帶米石每百石給番銀六圓每年約收番銀
二萬圓內送給總兵陋規銀三千八百八十八圓
柴大紀到任又令春季加送六百圓安平協副將
得受陋規銀二千餘圓又書吏工食紙張費用約
需番銀一千餘圓餘俱管口之遊擊千總各員收
用其文館則係海防廳同知管理入口船每隻收
取番銀二圓出口船每隻收番銀三圓領取硃單
每年加收番銀九圓又各船遇有額外多帶米石

每百石收取番銀六圓每年約收番銀三萬餘圓
除飯食紙張及設立小船引帶商艘出入一切零
星費用二千餘圓外餘俱同知收用雖海洋風信
靡常臺灣年歲亦有豐歉多寡不能畫一但調查
歷年船隻出入號簿核計所得陋規約畧相等鹿
仔港自四十九年經原任福州將軍永德條奏議
准添設口岸係理番同知與安平左營守備管理
船隻出入及多帶米石陋規與鹿耳門無異而船

隻較少每年同知約得番銀一萬餘圓守備約得番銀六千餘圓送給總兵規禮一千二百圓副將向不分送至淡水八里坌海口例不准船隻出入常有私自收入港口因該處產米甚多商販圖利順便販運出口亦有陋規並無定數該處係淡水同知與上淡水都司管理每年同知約得番銀六千圓都司約得番銀四五千圓都司又於所得銀內分送總兵一千圓文武各員及書吏人等供

出數目均屬相符僉稱相沿日久實不知起自何
年至乾隆五十一年賊匪滋事後此項陋規概行
停止因傳訊陞任遊擊李隆守備曾紹龍陞任
千總陳邦光千總黃明高等均係五十一年以前
管理海口之人俱各如數得受副將丁朝雄前在
安平協任內亦受過海口陋規陞任同知楊廷理
於五十一年八月到任十一月內即值逆匪滋事
止得過番銀一千四百餘圓查載米既有定額豈

容例外多帶其書吏字識人等飯食費用亦有定數何以三十一年清查定議之後復又多設款項任意需索是巡查海口並不實力盤驗轉以商販船隻視為利藪若不嚴加懲治日甚一日伊于胡底所有現在臺灣之陞任海防同知楊廷理陞任安平協中營遊擊李隆署安平協右營遊擊曾紹龍陞任鹿仔港守備陳邦光署安平協右營千總黃明高各收受出入船戶陋規銀兩雖係沿照陋

習收取但該員等或係責成專管或係輪派稽查
乃敢沿襲痼弊飽索分肥實屬胆玩均應革職各
杖一百流三千里從重發往新疆充當苦差副將
丁朝雄等以駐防海口大員並不鈐束備弁轉又
按月分贓應請革職一併問擬杖流從重發軍臺
効力贖罪以示懲儆其五十一年以前歷任臺灣
總兵海防同知安平協副將中左右三營輪管之
遊擊千總鹿仔港開設口岸後管口之理番同知

鹿仔港守備有陞調他省及降革事故回籍者移咨李侍堯查明一體問擬其五十一年以前歷任淡水同知上淡水營都司及四十九年以前鹿仔港理番同知鹿仔港守備所管口岸例禁出入乃各員並不嚴行查禁輒敢收受船戶陋規情節較重除陣亡各員外其餘均已任滿調回亦應咨明李侍堯嚴查從重治罪再臺灣田畝膏腴產米最多不特漳泉一帶藉資接濟即沿海各府地方食米

亦多仰給臺灣自未便以官吏因緣為奸遽將商
販概請禁止查臺灣回至內地船隻每船止准載
米二百石從前定例原屬因時制宜但情形今昔
不同內地各郡生齒日繁需米較多其自廈門蚶
江等處來至臺灣船隻無貨不可販運而回帆裝
載只有糖米二種捨此更無他物堪以帶售商民
趨利如鶩勢難禁遏與其潛滋弊竇不若明定章程
俾商販流通以臺灣有餘之米補內地民食之不

足嗣後橫洋船一隻應請准其載米四百石按邊
船一隻准載米三百石於印照上註明實數內地
收口照數查驗如例外多帶立予重究米石入官
並將臺灣管口員弁查叅議處其駕往浙粵等省
船隻仍照舊例止准備帶米六十石毋許稍有浮
濫各處封禁海口亦不准載米出洋以重海防至
海口巡查飯食及設立小船引帶商艘出入一切
費用均不可少三十一年所定文員衙門每船准

收番銀三圓武職衙門准收制錢自一百文至二百文不等近年食物昂貴實不敷用應請文員衙門每船准收番銀五圓武職衙門准收番銀三圓以資貼補其掛驗米石等項陋例一概嚴行禁革將所定章程勒石海口倘敢仍前需索額外私增一經船戶控告或巡查臺灣之將軍督撫提督查出即行據實嚴叅加等治罪至臺灣遠隔重洋督提二臣稽察實難周到全賴總兵督率將領實心

訓練方足以整飭營伍寧輯地方若專閭大員首先怠玩甚至翫法貪婪則將備盡皆效尤兵丁肆無忌憚罔利營私弊何底止臣等於柴大紀案內審出收受各營巡閱夫價兵丁曠伍替役出錢包差庇縱娼賭種種弊端即行徹底嚴究況當賊匪平定諸加釐剔之時尤宜亟為整頓未便稍有輕縱除安平澎湖水師兵丁尚無前項情弊外其餘南北兩路如出一轍臣等於各營內擇其在任年

久者每營酌調三四名來邸令將該營弊竇據實
供吐逐細根究如巡查夫價一節向遇總兵巡閱
時各營員備辦人夫擡送行李漸至折送酒席下
程銀兩為數無多亦無一定至柴大紀巡查南北
兩路即按營收取夫價視營分大小定數多寡均
係該都司守備千總把總按其所得廉俸分股攤
派彙繳惟外委錢糧較少並不派及柴大紀在任
巡閱四次俱照數收受惟陸廷柱接任俸止一月

有餘巡查南路一次夫價等項並未收取反覆研
究各營將弁所供均屬脗合又兵丁包差一節緣
各營自守備以上例有旗牌材官伴當管班四項
目兵在署輪流當差其千總把總等官分管之兵
或係存營差操或係看守倉庫惟彰泉兵丁與本
地民人大半同鄉言語相通多有在外生理之事
臺灣土產除米糖二種外無可販賣各兵原無資
本不過在街市售賣檳榔糕餅編織草鞋日積錙

銖為添補衣履之用其汀州兵丁善於製造皮箱
皮毯多在皮貨鋪中帮做手藝得受工資亦非開
行設肆該兵丁等日逐微利閒散自由憚於差操
拘束每月出錢六百文至三百文不等僱倩同營
兵丁替代上班名為包班此項包差兵丁惟彰泉
汀州最多他府較少而向來操防兵丁又不照內地
原營歸整安設一營之兵分作數十處以致漳泉
汀州兵丁散在各營南北兩路處處皆有包差之

事其實每營每汛不過數名所出包差錢文係代
班之兵及署內四項目兵得受自柴大紀到任以
後遇事婪索遂至備弁無所顧忌相率效尤各營
守備及千總等於所管包差兵丁亦零星派繳錢
文惟都司以上及標鎮三營城守營守備並無分
肥染指情事又縱令兵丁開賭一節訊據各營將
弁供稱臺灣賭風甚盛南北兩路守備千總把總
等於所管汛地內派兵巡查該兵等遇有開賭之

處每處勒索錢百十文緣臺灣無籍遊民並無家
室者名為羅漢脚多以賭博為事每人各帶錢數
百文即於街市環坐聚賭骰牌跌錢之外更有僅
用蓆片上畫十字即可羣聚壓寶雖素未識面之
人皆可共賭朝東暮西並無定所該汛兵丁遇見
即將攤場錢文稍為分潤每處百餘文或數十文
實不能多為婪索四十八年以後兵丁等所得錢文
均與本管營員陸續分用此內惟鎮標中左右三

營向設千總把總輪流值日凡遇差務及上司過往並收拾演武廳預備總兵將備茶水點心不無賠累所得庇賭錢文均為添補值月之費該營守備等並不分用間有零星費用之事亦俱令值月千總把總代為備辦又城守營管理崗山羅漢門哆囉囑等汎境地偏僻毗連內山大抵務農耕種者居多偶有賭博處所索錢更屬無多亦千總把總兵丁分得守備並無得受又兵丁窩娼一節訊據

供稱戍兵來至臺灣因近年兵房坍塌無可棲止
租賃民房力有不贍娼家留兵居住藉以包庇而
兵丁既省房租兼可寄食並非自行窩娼亦無另
得錢文查臺灣各營將弁不知勤慎操防整飭營
伍乃於上司巡閱則餽送逢迎於所管兵丁則貪
得餘潤縱令包差曠伍貿易甚至索取庇賭陋規
不論錢數多寡自數十文至一百餘文不等遇事
婪索卑鄙不堪且任聽兵丁居住娼家不加約束

以致存營兵少日益廢弛其貪劣貽誤釀成巨案之罪實為重大當賊匪滋事之時該員弁等守城打仗雖各有微勞亦難相抵所有餽送夫價又得受包差開賭錢文之南路營署都司邵振綱署守備陳朝魁把總靳金樑陳國泰鄭攀鳳吳亮南路下淡水營把總葉琪英北路千總帥挺巫昆把總許朝芳北路左營把總陳國忠孫朝亮北路右營千總李進得北路右營署守備席榮千總黃廷揚

北路淡水營千總張正耀譚朝亮並未餽送夫價
得受兵丁包差開賭錢文之鎮標中營把總石光
陞董學海蔡日助左營把總王殿開施必得鎮標
右營千總鄭名邦王聯登李春奎城守營左軍千
總沈祖禮把總符敦仁城守營右軍把總石生輝
二十八員均請斥革從重發往新疆効力贖罪南
路營叅將瑚圖里鎮標右營遊擊左淵城守營陞任
守備李步雲已革鎮標中營守備王天植雖無分

用錢文但平時既不實力操演餽送柴大紀生日
節禮而於種種弊端又不嚴行禁革任令所轄官
兵庇賭包差明知故縱實非尋常怠玩可比瑚圖
里左淵李步雲均請革職與業經叅革之王天植
從重發往軍臺効力贖罪又竹塹守備董得魁於
五十一年七月內到任八月內因楊光勲結會一
案帶兵防守彰化並於竹塹交界處所查拿逸犯
旋又帶兵把守大甲溪未經回署該管兵丁包差

庇賭錢文雖訊未分用但於賊匪滋事之前到任
業經數月並不嚴行查禁即屬容縱驗看其人亦
甚平常守禦並無勞績應請革職以為玩縱兵丁
廢弛營伍者戒其四十八年柴大紀到任以後查
有陞調他省降革事故及班滿調回內地各員弁
俱經攤派銀兩逢迎饋送包差庇賭分得錢文均
屬法難寬縱應咨明李侍堯確查一體從重辦理
總兵陸廷柱在任未久並未收受夫價經雅德扎

查臺灣營伍亦將廢弛情形稟覆但柴大紀種種劣蹟並不據實揭叅究屬不合應請將陸廷柱交部嚴加議處至臺灣城守營叅將宋鼎到任未久即值賊匪滋事適因腿上生瘡力疾前往大湖地方打仗守城殺賊頗為奮勉出力今柴大紀案內究出該員失察所屬千總把總得受包差開賭錢文自應與左淵等一律懲治但該員保護郡城堵禦賊匪尚有微勞且到任甫及四月情罪究屬有

間應請將宋鼎交部議處鎮標左營把總翁振行
於五十一年十一月到營即值逆匪滋事訊無婪
索情弊應免置議至各營四項目兵及包差庇賭
兵丁等原應按名查辦但念營制廢弛由於該管
員弁貪縱所致節年班滿兵丁均已換回內地自
林爽文滋擾以後戍兵早已傷亡所存各兵亦皆
打仗守城隨同出力一載以來並無前項情弊懇
免追究至永福業經請

旨草職送交刑部治罪茲復調取道府各衙門卷宗逐一研勘富勒渾於乾隆四十九年五月內札行臺灣鎮總兵及道府等以臺灣營員怠玩並不按期操演不肖兵丁多有包庇娼賭之事行令確查嚴禁並令將坍塌兵房即行查明詳估永福奉札後轉行營縣出示查禁即以並無廢弛稟覆原發正稟例存督署卷內現有批回副稟開註事由可據是年七月九月屢經富勒渾札查臺灣諸務廢弛

營兵仍復滋事飭令據實稟覆永福復轉行臺灣
府知府孫景燧據該府兩次稟覆內稱會同柴大
紀加意稽查現在營員俱能鈐束兵丁並無滋事
等語永福遂即據稟轉詳並未另行揭報僅將坍
塌兵房勘估會詳及雅德到任後以所估浮多駁
令刪減分別賠修延至逆匪滋事時仍未修建亦
未將營員貪劣之處稟報至海口係文武員弁同
管將弁既分給總兵陋規豈有海防同知轉不饋

送道員之理又柴大紀巡查南北兩路勒取各營夫價而永福亦巡查地方自不無需索陋規情事嚴訊實無分肥染指之事至巡查地方同協辦道楊廷樺去過一次沿途人夫飯食都是各廳縣預備供應實未收受銀兩惟每年所屬三廳四縣按照年節饋送節禮每員每節各送番銀二百四十圓至三百二十圓不等該員任內共收過番銀一萬餘圓署內供應及修理衙署等事係四縣派家

人在府按月輪流承應等語臣等查永福身係滿洲為監司大員當海疆重任不思出力報効乃自到臺灣之後遇事顚頊毫無整頓且得受屬員供應節禮任令貪縱殃民不加稽察親見柴大紀廢弛營伍飭法貪婪該叅道近在同城平時既已瞻徇及至富勒渾屢次札查仍以並無廢弛具稟朦混欺飾尤為可惡自係因地方政治不修與營制廢玩相等惟恐柴大紀持其短長不得不代為容

隱是柴大紀貪婪之罪竟由永福徇縱而成應與
罪人同科雖自賊匪滋事以後守城尚有微勞而
核其功罪斷難相抵應擬絞監候即行派委妥員
解送刑部仍應抄沒家產以為徇隱玩愒者戒所
有饋送節禮各員內張貞生一員業經另案叅革
其陳良翼王露二員雖守城各有微勞官聲亦好
但違例供應呈送陋規均屬不合應一併革職查
明該員供應饋送數目令加賠罰出充公再查副

將丁朝雄於五十一年奉調引

見後回至省城聞逆匪滋事即稟明常青趕回臺灣勦
捕上年九月十七日率領兵丁進攻南路收復東
港以通粵庄運米來郡節次打仗禦賊甚為勇往
出力經臣保奏請補海壇鎮總兵又遊擊李隆守
備曾紹龍守禦嘉義把總吳亮守禦府城外營盤
復往南路追勦賊匪均屬奮勉守備王天植於逆
匪攻擾府城時悉力堵禦並令伊子王陽春招集

義民勦捕遇賊陣亡情殊可憫又在軍營帶兵之
遊擊倪賓守備鄭玉楷千總袁良禧賴國振把總
游國通藍國寶及帶領內地義民之守備陳大成
或隨臣打仗殺賊或分派駐守地方搜拿逆犯均
屬始終勤奮著有勞績撤兵後業經內渡回營自
應移咨李侍堯照例詳核該員等情罪分別遣發
但念其搜勦逆匪帶兵打仗均為將弁中出力之
員且所得海口陋規究係相沿積習餽送夫價亦

由柴大紀貪縱所致以功抵罪兩不相掩不敢不據
實陳明可否量為末減之處出自

皇上天恩再叅將瑚圖禮之父健銳營翼長札穆丕納
出兵西路雲南金川五次

賞給克爾齊克伊巴圖魯名號雲騎尉世職旋在巴朗
拉陣亡加給騎都尉世職即令瑚圖禮承襲瑚圖
禮在金川出兵一次由前鋒副叅領補放叅將賊
匪攻擾鳳山迎勦得勝盡力窮追不顧後路另有

賊匪由北面龜山乘虛撲進遂致失守旋於二十
二日帶兵恢復二十四日調赴山猪毛迎取下淡
各營兵丁來縣防守回至硫磺漢被賊匪阻溪攔
截不能前進鳳山復陷時瑚圖禮並未在城經常
青查明並無畏蕙潛逃情事至六月內該員帶領
義民由小路翻山進攻南潭復隨在郡城守禦半
載以來尚能出力今因饋送柴大紀夫價定擬發
往軍臺自係應得之罪但念伊父屢著勞績身沒

行間該員係屬單丁尚無子嗣可否俯從寬典將
瑚圖禮免其發往軍臺令在拜唐阿上行走俾得
生有子息以綿勞臣宗祀再查楊廷理原係同知
各州縣非其專管並無激變殃民之事迨逆匪滋
事之初首先招集義民守城打仗始終保護無虞
大兵進勦時復由三坎店帶領義民前至軍營隨
同打仗始終勇往出力臺灣民刁俗悍素稱難治
現在賊匪蕩平一切撫綏整頓尤賴幹才臺灣現

任各員祇有楊廷理徐夢麟二員最為出色楊廷理自擢任知府以來實心實力辦事公當民情極為畏服現委署理臺灣道篆措置頗覺裕如今該員既經獲罪即應摘印離任但海疆要缺當民心甫定之後難以遽易生手且現在海外並無堪以接辦之人該員所得陋規究係相沿積習謹核其才具政績據實奏

聞可否准其留於臺灣戴罪効力將伊所得銀數加十

倍罰出充公再柴大紀永福現應解京經臣遴派
汀州鎮標中營遊擊海亮臺灣府理事同知吳元
琪建寧府同知楊世綸分起管解起程查海亮業
經奏陞長福營叅將例應就近引

見楊世綸隨常青在軍營辦事奮勉奉

旨賞戴花翎俟軍務告竣送部引

見現經臣給咨赴部至吳元琪於五十二年四月補授
理番同知正值逆匪滋事仍留郡城辦事委署臺

防同知自臣抵臺以來陸續拿獲有名股頭曾光裕等十三名並獲偽軍師金娘賊匪楊山等十六名起獲莊大田偽印一顆實為留心出力應請勅部一併帶領引

見奏入

上諭內閣曰福康安等審訊柴大紀永福等分別定擬一摺著交軍機大臣會同大學士九卿法司核擬具奏臺灣地隔重洋文武各員自應各矢潔清力圖整

頃乃不肖員弁竟敢需索陋規廢弛營伍甚至縱令
兵丁等包賭窩娼從中染指以致釀成巨案此而不
嚴加懲創何以儆官邪而靖海疆至崇大紀身任臺
灣總兵每次出巡時不但令各營弁備辦供給且折
收夫價銀兩贓私累累國家設給養廉於大員特加
豐厚以備伊等因公之用若巡閱營伍時仍須該管
弁兵代辦夫馬飯食一切則內地之督撫學政提督
於出巡按試時途次夫馬等項亦必令地方官代為

置備又安用優給養廉為耶嗣後督撫提鎮及學政等凡遇巡查出考途次所需夫馬等項均着自行備用毋得令經過各員代辦並令文武各員互相糾察如有仍前需索擾累者即各行據實叅奏從重治罪如或徇隱不奏別經發覺朕亦必將徇隱之員一併治罪決不姑貸勿謂朕不教不誡也

上又命軍機大臣傳諭李侍堯徐嗣曾曰楊廷理收受陋規自有應得之罪但念該員平時尚屬奮勉此次

委辦軍務於一切運送糧餉等事辦理俱能妥協其
所得陋規係在同知任內非知府大員可比且甫經
平定一切事宜未便遽易生手楊廷理從寬改為革
職留任如果八年之內始終出力勤奮方准開復並
將伊從前所得陋規銀兩加二十倍罰出以示懲儆
此係朕格外加恩棄瑕錄用伊自當倍加感奮激發
天良以圖勉力自効若因有罰項轉於地方藉端勒
索致有肥橐殃民之事著李侍堯徐嗣曾嚴行查察

據實叅奏即當立予重辟不止於發遣已也

上又命軍機大臣傳諭徐嗣曾曰徐嗣曾係本省巡撫
在任有年武職營伍尚可委之總督而文職內有收
受陋規營私貪黷等弊即應隨時查訪據實叅奏非
如福康安係特旨簡派前往臺灣專辦勦捕逆匪者
可比總督李侍堯到任未久隨駐劄廈門料理一切
軍務未暇查辦及此魁綸亦係新任將軍徐嗣曾皆
非其比乃徐嗣曾竟若忘其自為巡撫置身局外耶

其於楊廷理收受陋規之事平日既漫無覺察不行查叅經福康安徹底查奏又復覘顏一同列銜而摺內竟無一語引咎之處殊不可解著徐嗣曾將因何不早行叅奏及會銜具奏又不自引咎之處明白回奏

上又命軍機大臣傳諭福康安魁綸徐嗣曾曰福康安奏瑚圖禮之父扎穆丕納出征陣亡該員係屬單丁可否免其發往軍臺俾得生有子息一節因詢之由

臺灣軍營回京侍衛章京等稱瑚圖禮現年約三十餘歲等語滿洲人員祖父有軍功者甚多而軍臺効力不過三年期滿即當釋回計瑚圖禮釋回時尚不滿四十歲儘可生有子息若因此遽寬其罪將來有軍功者諒其子若孫亦係單丁勢必援此紛紛聲請又復何以示懲俟議覆上時仍當將該員發往軍臺効力

欽定平定臺灣紀畧卷六十一

欽定四庫全書

史部

欽定平定臺灣紀畧卷六十五

內閣中書_臣沈鵬覆勘

武英殿纂修中書_臣彭元琬

欽定四庫全書

欽定平定臺灣方略卷六十三

六月初三日

申

上命軍機大臣傳諭福康安李侍堯徐嗣曾曰從前平

定伊犁回部大小金川皆於太學立碑以示武功臺

灣不過亂民聚衆海島一隅雖不值刊碑太學而此

次辦理迅速首夥生擒亦不可無紀實之作朕現在

駐蹕熱河欲將此次平定臺灣事蹟御製記文於熱

河文廟大成門廡內嵌石刻碑振武數文盛軌永
昭上塞俟紀文製就後當一併發與福康安等在臺
灣廈門等處配建碑亭勒石所有前次發去之御製
文三篇著福康安等暫緩鐫刻俟此次記事文發往
後一同敬謹摹勒庶規模丈尺咸歸畫一足以壯觀
瞻而垂久遠

同日福康安魁綸徐嗣曾奏言熟番募補屯丁悉
心酌議章程一屯丁人數應按番社酌挑令其就

近防守也全郡熟番通共九十三社臺灣縣屬番社較少淡水彰化近山地方番社最多鳳山嘉義次之每社番民自數百户至數十户不等約可挑選壯健番丁四千名分為十二屯大屯四處每處四百人小屯八處每處三百人作為額缺毋庸另設屯所即令在本社防守地方稽查盜賊其户口較少之社或數社併作一社或附入近處大社庶番民等不致遠違鄉井而較驗調派亦易於齊集

至各屯相距之地道里難以適均臺灣縣所屬番社不過數處不能多設屯丁然臺灣縣地界本狹郡城設有重兵足資彈壓惟南北兩路近山險要甚多淡水一廳尤為遼濶原撥熟番在隘口搭寮防守名為隘丁零星散處不能得力應酌量地勢情形按照番社多寡分別設屯與各處營汛官兵聲勢聯絡則稽察巡防自可倍加嚴密一各屯番丁宜設立屯弁以資管轄也四川屯練兵丁額設

土守備千總把總外委等官一百餘員今臺灣番
屯弁目無需似此之多祇應仿照其例量為設立
查各社原有民人充當通事管理一社之事代為
交納社餉但此等通事積年充役係地方官簽派
本非番人同類未便用為弁目應於番社頭目內
擇其曾經打仗出力及社番素所信服者如岸裡
社潘明慈之類揀選拔補於南北兩路額設屯千
總二員統領番衆屯把總四員分管各屯大小各

屯每處設屯外委一員花名圖冊交理番同知稽核仍將各屯事務交北路協副將南路營叅將就近管理該番等素嫻妓藝非招募新兵可比應請照川省屯練之例毋庸歸營操演點驗屯兵拔補屯弁等事統歸臺灣鎮撫兵臺灣道管轄詳報督撫給與劄付報部存案經管六年後如果董率有方曾著勞績由鎮道核明詳報督撫加一等賞給職銜以示奮勵倘所管內有生事廢業之人及苦

累番衆情弊即行咨革究處遇有事故出缺仍揀
選番社悅服之人詳報拔補一屯丁屯弁毋庸籌
給月餉應酌撥近山埔地以資養贍也臺灣東界
內山本多曠土乾隆十五年暨二十三年節經勘
定界址奏請禁民越墾准令熟番等打牲耕種以
資生計無如游民聚處日多越界佃耕漸成熟業
以致爭奪滋事控案甚多前經富勒渾奏明專委
鎮道確切勘丈尚未勘明詳報即值逆匪滋事現

經臣等提奏核査共計丈出已墾埔地一萬一千二百甲每田一甲合內地民田十一畝三分一釐均應查明民墾畚墾分別陞科辦理此外尚有未墾荒埔五千四百四十一甲又四十八五十一等年漳泉械鬪及互控結會案內抄沒翁雲寬楊光勲等入官埔地三千三百八十餘甲統計抄沒未墾及入官荒廢埔地八千八百餘甲均屬界外之地逼近內山任其荒廢地利既屬可惜而愚民趨

利如鶩亦難保無越境私開情弊應請將新設屯
丁四千名每名撥給埔地二甲十摠每員十甲把
摠每員五甲外委每員三甲令其自行耕種責令
地方官勘定界址造冊繪圖載明四至段落通報
立案以脩稽查屯丁出缺即挑其子弟充補承受
田畝如有私行典賣者照律治罪追賠契價充公
其地仍歸番社再查臺灣各社向例交納社餉所
種田畝租賦蒙

恩概免征收所有撥給埔地應照畚田之例免其納賦
以示體恤即毋庸另行籌給月餉一清查已墾埔
地以定界址也查臺灣東面倚山地方寬廣從前
因淡水彰化二處墾闢日增另行畫定界限設立
土牛禁止奸民越界佔墾免滋事端乃因生聚日
繁民人私向生熟畚田地耕種價值稍輕者謂
之租墾價值稍重者謂之典賣熟畚等歸化日久
漸諳耕作祇因業經典賣與民無由取贖是以各

處番地不特嘉義以南多有侵越即淡水等處續
定土牛之界亦成虛設臣福康安追勦賊匪時週
歷全郡所過近山地方良田彌望村落相聯多在
輿圖定界之外舊設土牛並無遺址可尋從前設
立時不過築土作堆潦草塞責本非經久之計此
時若不將埔地徹底清釐事過境遷界址必仍滋
淆混臣等悉心籌酌除未墾荒埔五千四百四十
餘甲撥給新募屯丁外其已墾之一萬二千餘甲

自應分別辦理查臺灣征糧則例仰蒙

皇上優恤海外民番於民田則薄征租賦於番業則槩
免征科茲查民人租贖之地無多原係民為佃戶
番為業主自應同番社田畝一體免科其業經賣
斷與民者既非番業即應令民戶一體報墾第民
買番地之後所費開墾工本原多又有每年抽給
番租之例若再征收本色民力未免拮据應照同
安縣下沙科則按甲計畝征銀免其納粟仍出示

曉諭番社使知租額無虧俾得永資生計民人等
藉有納賦明文世守其業亦可永杜弊端其集集
埔虎仔坑三貂瑯嶠等處接壤生番私墾田畝甚
多此等偷越民人本應逐加懲治惟念開墾以來
與生番日久相安並無事故一經驅逐沃土既須
拋荒而遊民又無歸宿應請照新定民賣番地之
例一概陞科免其查究此時正值農忙之際未便
紛紛履勘應令該處民番將租贖典賣地畝先行

呈報一俟刈獲登場臣徐嗣曾專委大員前往抽查並將此外有無續墾地畝一併查明分別辦理咨部存案自此次清查之後即以所墾地方為界豎立界石詳開立界年月地方大書深刻俾人一望而知仍交與巡視臺灣之將軍督撫提督及地方官等不時周歷巡查如有越界私墾即行從重治罪失察之地方文武各官一併嚴叅究處一屯丁習用器械應令自行制備報官點驗也番民打

杜捕鹿所用鏢鎗鳥鎗竹箭器械不一均屬犀利
即如岸裏社番善用鳥鎗隨同官兵打仗殺賊最
為賊匪所畏一切器械均可無庸製給但現在嚴
禁民間私藏軍器屯丁所用鎗箭亦應官為點驗
以備稽查所有新設屯丁四千名不必照綠營之
例拘定鳥鎗兵若干名弓箭兵若干名祇以該番
習用器械為準呈報摠兵逐加印絡編號備查每
年令摠兵巡查之後點驗一次如無火烙印記即

照民人私藏軍械之例一體治罪一屯丁徭役酌與優免以恤番力也臺灣各社熟番質樸醇良最堪憐憫從前文武員弁出差巡察無不調撥番民背運行李其餘各地方興築遞送公文等事亦皆社番應役其勞苦急公之處較之臺灣民人不啻數倍今既挑補屯丁各令在要隘地方分屯防守遇有搜捕盜賊等事又須聽候征調所有一切徭役應請免其承應其未補屯丁之番民亦祇令遞

送公文不得以私事役使倘地方文武及理番同知不加體恤有苛派擾累之事令該鎮道實力查訪嚴行叅究奏入

上從之

初六日丁酉福康安徐嗣曾同奏言辦理賑務原應

支放本色或銀米兼散以濟小民口糧惟查臺灣

自軍興以來截至本年二月由內地撥到軍米共

計三十二萬餘石除撥過兵糧等項外存米七萬

餘石其續撥軍米因海洋風信靡常尚未運到維時凱旋官兵陸續分起內渡尚未全撤且各路米價均極昂貴必須廣為平糶以減時值俾通郡商民皆足以資接濟計算所存米石僅可為兵糧平糶之需不敷散賑而臺地貧民向藉番薯雜糧同米搭湊糊口得銀便於零買又因米價貴至三兩以外恐一時未能平減難民買食仍未免拮据請旨每石給予三兩但按之舊例實覺過多未便遽行擅

給是以仍飭各屬先照向例給發二兩恭候

批示到日察看田禾市價情形再行補給嗣因三月下旬以後糧價有減無增連次得有透雨禾苗暢茂可望豐收即照向例折給實已足敷接濟毋庸於每石二兩之外再議加增茲查臺灣府屬一廳四縣被難民番男女共四十四萬八千八百七十八口小口共二十一萬八千九百七十口共放過賑銀十六萬七千五百八兩九錢內有斃獨殘病等

口並極貧難以度日應展賑一月現已查明大口
共十四萬一千九百六十八口小口共八萬六千
九百七十二口共應給銀五萬五千六百三十六
兩二錢又各難民歸莊之前無處棲止給銀苫蓋
草蓆共九萬八千五十間共銀二萬四千五百十
二兩五錢通共需賑恤銀二十四萬七千六百五
十七兩六錢現飭造具戶口花名清冊送部核銷
至臺灣官吏侵漁成習不可不嚴行查察

臣福康

安現駐郡城籌辦一切善後事宜釐剔弊端尤為切要況地方賑務如有侵

帑殃民情罪至為重大斷不肯稍任欺隱此次所辦

賑卹時刻留心訪察實無預圖冒銷情弊

臣徐嗣

曾前自北路以至郡城屢經親赴各村莊抽查戶

口並面諭義民首及業戶人等據實呈報使胥吏

等無從舞弊至散給銀兩先經出示曉諭查明戶

口後按名照數發給仍隨時密訪親查斷不使官

吏稍有侵扣及浮冒開銷至逆案內入官田產南北兩路處處皆有現就各犯供詞並業戶鄉耆人等遍加訪察遴委妥員分赴各處村莊履勘畝數界址以免混淆遺漏自應凜遵

恩旨逐一查明酌量撥給戍兵作為恒產惟是兵丁等各有操防之責不能自行耕種且定例往來挨戍若令招佃收租又易起指欠侵挪之弊應請將此項田畝交與地方官經理征租會同各處駐劄營

員當堂按名散給通報查考以資戍兵當差之用
其應撥畝數及每兵每年應給若干銀數之處容
臣徐嗣曾查明叛產另行分晰具

奏再現在臺灣澎湖兩處補額及新添戍兵俱於本
有征兵內挑補該兵等調撥渡洋已逾一載衣履
等項不無缺損其舊存戍兵等隨同勦賊祇領月
餉月米並無鹽菜銀兩體察情形均不免于拮据
臣等公同商酌所有新舊戍兵請先按名賞借銀

二兩計兵一萬三千二百名共需銀二萬六千四百兩即於軍需款內供支散給仍俟將來撥給叛產征收租息扣還歸款又陳泮一犯前經投出情願訪拿賊首贖罪當將該犯家屬留於軍營准令前往續據拿獲股頭匪夥黃富等數名投解復行入山跣緝及林奕文就獲大兵南下該犯並未旋回臣抵郡城後差人查訪業經潛逃當將伊母及妻子等監禁一面分派官兵義民各處搜拿一面

諭知內山水沙連生番堵截于四月二十六日將
陳泮拿獲二十九日在嵌頂地方並將吳領拿獲
一并解送查陳泮與蔡福何有志陳秀英等黨惡
助逆分管北路賊夥最為林爽文信用當賊匪窮
蹙之時自行投出復敢乘間潛逃希圖漏網實屬
怙惡不悛吳領雖未受封偽職但屢次抗拒官兵
最為兇橫均應派委妥員解京審辦至林石係林
爽文族長居住阿罩霧莊王芬等招同林爽文拒

捕時林石再三勸阻將林爽文藏匿山內冀箕湖
地方不許滋事匪夥等復來糾約遂決意聚衆謀
逆林石年逾六旬摠在本莊居住並未從賊打仗
得受偽職上年十二月內拿獲該犯到營嚴行訊
問並將所供情節質之賊首賊目等供亦相符臣
復查該犯林石雖與林爽文各庄居住未曾從賊
打仗又有勸阻謀逆之事但究係林姓族長未便
輕貸應從重歸入緣坐人犯內辦理至董喜一犯

前據賊首所供在集集埔病斃之語原不足信復據搜獲正法之匪犯林乾供亦相同並稱病斃後即於集集埔山塢下掩埋伊所親見業經派員赴集集埔查勘並無屍身可據訊之董喜妻弟涂允並屢次派員分路查拿並無蹤跡連日細加察訪又有竄往藤口社一帶之信查臺灣地方人情虛詐屢次搜拿匪犯妄報信息者甚多未可盡為憑準但既有此信亦不可不嚴行查緝已派賞給同

知銜之教諭郭廷筠都司莊錫舍義民首劉繩祖
黃袞等帶領熟悉路徑義民等直入番界搜查並
諭知社丁王和江如海生番頭目斗蠻等派撥生
番在內山協拿若未伏冥誅自不能遠颺漏網又
莊大田之子莊天畏雖據獲犯供稱已被生番殺
死但亦不可憑信仍應與代管莊大田地畝之黃
天養一體嚴拿務獲報解至投出賊目本非良善
特見官兵勢盛相率歸誠希圖自尋生路臣亦欲

藉此離散賊黨示以寬大免究前罪為一時權宜
允准之計茲賊匪業已蕩平不便仍留臺灣令其
歸庄安業自應分別遷徙內地他省酌加安插查
西北各省道途遙遠解送為煩中途或有脫逃更
屬不成事體江浙廣東等處濱海地方皆有海道
逕達臺灣不便派往此外惟貴州湖南廣西等省
堪以安插臣等將投出賊目等詳加查核除脫逃
復獲之陳泮一犯仍即解京審辦外其應行遷徙

之人查阮和等九名自投誠以來隨同打仗殺賊官兵入山追勦時帶領路徑偵探賊踪並屢次擒獻賊匪察看情形實為認真出力雖與莊錫舍於滋事之初首先投出者不同而核其勞績竟與莊錫舍無異應將阮和等九名遷往內地安插查延平建寧府皆非沿海地方應即交與各該鎮總兵令其入伍食糧藉資約束如能始終奮勉再以把總外委等官拔補若敢稍不安分即行加等治罪

至李祖生等一百餘名俱請發往湖南貴州廣西
烟瘴地方分縣安插交與該地方官嚴加管束如
敢稍滋事端報明督撫即行正法臣等酌商定議
後即行面加曉諭以爾等曾經附逆原屬罪在不
赦仰蒙

皇上法外施仁因爾等於大兵進勦之時即知悔罪自行
投出隨營効力尚有一線可原但爾等於從賊時
騷擾居民若即釋令歸莊居民必不相安轉恐紛

爭滋事今將爾等遷入內地即應搬取眷屬一同
配渡該賊目等俱願遷移情形極為感懼業已陸
續搬眷來郡隨到隨令登舟酌令十餘人為一起
即於撤回之廣東福建都司守備等官內順便帶
同弁兵管押前赴內地交李侍堯查明指定省分
分起解送人數既少沿途小心護送自不致稍有
疎虞現在送往內地者已有四起其餘臣徐嗣曾
陸續解送再逆匪滋擾時海岸港汊地方多被佔

據安平協水師在鹿耳門鹿仔港兩處要隘防守
其餘通海溪河甚多照料難於周密經李侍堯派
撥護提標遊擊事守備李德勝帶領千總二員把
總五員外委二員水師兵丁一千二十四名駕船
八隻於臺灣澎湖洋面往來巡查自上年六七等
月起至本年三月止照例每月祇領口糧並無支
給鹽菜銀兩日用所需未免拮据是以于軍需項
下照征兵鹽米銀數酌量借給共借過銀七千五

百六十餘兩應在各官兵養廉錢糧內扣還歸欸
第查此項官兵雖未至軍營打仗但究自內地調
派前來且於洋面梭織巡邏堵截逸匪涉歷風濤
已逾半載亦曾經奪獲賊船砲械奮勉出力實與
征兵無異自應一體支給鹽菜請照征兵之例一
併准令開銷再查叅將那穆素里都司世襲騎都
尉羅光炤學習難廕守備黃喬隨同郝壯猷在鳳
山縣守禦嗣因鳳山失守經常青將那穆素里等

三員奏叅革職千總盧思聰等十四員咨部斥革
又叅將周世佐守備衛觀光把總鐵柱因失察延
燒火藥亦經革職又失陷鹿仔草寨內遊擊劉越
降為都司遊擊董秉燦降為守備守備林士元革
職各在案以上各員均經常青等奏明留於軍營
効力以觀後效今軍務告歲自當確加查核據實
奏

聞查那穆素里同丁朝雄收復東港擒獲賊目吳豹等

審明正法羅光炤屢在南潭嘉義打仗身中鎗傷
鉛子未出復拿獲賊目楊臺選王是二名黃喬在
東港堵禦經丁朝雄派往收燬賊藁數百間均能
奮勉出力其盧思聰等十四員打仗殺賊俱屬勇
往內有千總盧思聰外委姚登二員現已陣亡至
周世佐衛觀光鈇住三員派往南路同副將五達
色侍衛果爾敏色勦賊屢得勝仗俱能圖功贖罪
應請將那穆素里周世佐羅光炤黃喬衛觀光送

部引

見其千摠以下等官各降一等給予職銜歸營効力如
能奮勉再以實缺咨補鹿仔草失陷案內降革各
員除劉越一員隨臣等打仗頗為出力業經奏請
留任外董秉璫林士元二員在鹽水港守禦不過
隨衆行走業經降革應請毋庸置議再革職遊擊
藍田玉奉

旨革職令在臺灣府城永遠枷號示衆彼時正值用兵

之際既經叅奏自當從嚴辦理以肅軍紀惟因此
次

諭旨本年二月始行奉到上年臣至嘉義時該員懇請

隨往北路勦賊常在前敵隨同海蘭察打仗極為

奮勇查藍田玉由兵丁出師雲南金川歷陞遊擊

賞戴花翎曾帶五處鎗傷三處石傷其左股鎗傷之處

已成漏瘡至今未愈該員遺失軍器之罪雖無可

追但業經革職已足蔽辜且同往嘉義之魏大斌

特克什佈張萬魁劉唐等所帶兵丁器械多有遺失何以柴大紀並未究問獨將該員移咨常青指叅^臣等審辦柴大紀時亦曾將此一節向其訊問據供魏大斌等因賊匪攔截器械多有遺失我查問遺失數目各員未能即刻查明登荅言語尚有情理惟藍田王一員既未將數目查報又恃其屢次出兵諳習打仗心存輕忽出言不遜我所以稟揭常青不想常青就據咨叅奏等語可見柴大紀揭報

之處未為公允仰懇俯念藍田王久著勞績此次打仗殺賊又屬奮勇免其永遠枷號再臣查安平左營外委鄭廷棟前於鹿耳門巡哨見把總高大捷畏賊脫逃即向盤詰設法拘留飛稟該叅將拿獲立正典刑俾衆共知儆懼實屬能事可嘉已傳詢鄭廷棟面加獎諭先賞結千總頂帶交與普吉保遇有千總缺出即行拔補又淡水廳幕友壽同春係浙江諸暨縣監生年已七十餘歲在臺灣作

幕年久熟習民情地勢當竹塹城失陷時同知程峻先已被害壽同春親赴各莊招集義民於五十一年十二月內同官兵恢復竹塹城擒獲賊目王作等四名五十二年十月內徐鼎士等渡大甲溪進勦壽同春帶領義民駐劄烏牛欄初十日出哨進逼三十張犁地方賊匪設伏衝突義民潰散壽同春馬蹶被擒罵賊不屈被賊支解又廣東嘉應州監生李喬基當林爽文倡亂之初即在彰化縣

岸裏社地方首先倡義捐資招募民番分設七堆並分撥義勇協守鹿仔港海口接候官兵與賊打仗數十次殺賊甚多五十二年正月內親督義民進攻大里杙直逼賊巢西門焚燬竹園被賊大砲轟擊未能攻克二月十二日在牛罵庄打仗被賊擒去迫降不屈慘遭磔死又查同知劉亨基有未嫁幼女滿姑年十七歲賊陷彰化搶入劉亨基公館家屬紛紛逃避惟滿姑依戀伊父不肯外走賊

匪擁進內房劉亨基被害滿姑奔投屋後水池水
淺不能即死號哭痛罵賊匪割其口鼻罵不絕聲
遂遭殺害壽同春年逾七旬本無職守始則協同
收復城池繼則奮勇深入賊庄致遭支解李喬基
為義倡始疊著勞績被賊擒獲誘降仗義不屈而
劉滿姑以弱女罵賊抗節捐軀志節均屬可嘉而
死難尤為慘烈實堪憐憫懇飭部贈卹旌表以示
彰勸至義民等歿於行陣亦應照陣亡兵丁議卹

現據各地方官陸續造報臣徐嗣曾咨部辦理再賊匪滋擾嘉義時教諭江浩招集義民守禦頗為出力俸滿巡檢吳元隨同知縣陳良翼督率義民固守被賊鎗傷丁艱典史李爾和在彰化巡防遇賊身受鎗鉅重傷曾經常青詢明具奏查江浩本無地方之責吳元李爾和業經俸滿丁憂各已離任因值逆匪滋事均能黽勉出力禦賊受傷未秩微員尚堪嘉獎相應奏明開具伊等勞績咨部議

叙至應行議卹官員兵丁等自乾隆五十二年十一月
初八日臣等進兵時起至五十三年二月初
五日止節次打仗並在各處搜山共陣亡傷亡漢
屯官弁兵丁四百七十八員名又自五十一年十
一月起至五十二年十一月初七日止陣亡傷亡
官弁一百四十八員滿漢兵四千九十五名一併
造冊送部又隨同臣等打仗及常青等督兵時受
傷之官弁兵丁等亦分別等次咨部照例辦理再

查俸滿南投縣丞周大綸署斗六門巡檢羅漢門
縣丞陳聖傳署鳳山縣教諭葉夢苓訓導陳龍池
署猫霧棟巡檢渠永謨淡水巡檢張芝馨彰化縣
典史馮啟宗諸羅縣典史鍾燕超鳳山縣典史史
謙皆係循分供職之員賊匪滋事時該員等以微
末官員力不能支即以身殉殊堪憫惻合無仰懇
皇上天恩勅部照例議卹以示勸勵至魁綸自到郡城
一月以來留心學習於一切情形已能諳悉將來

輪赴臺灣巡查地方可資經理查該將軍本任亦
關緊要應令先行內渡已于四月二十八日由鹿
耳門登舟候風梁朝桂蔡攀龍均係提督大員內
地營伍之人所有挑補兵丁查辦臺灣營伍等事
均已告竣亦令梁朝桂先赴本任蔡攀龍係水師
提督臺灣是其專轄應令與普吉保分往南北兩
路及澎湖地方將安設水陸各汛逐一查勘再行
赴任至已圖魯侍衛等不服水土患病者甚多現

在趕緊調治痊愈令副都統翼長六十七帶領一起於臣起程之前先行配渡其暫留臺灣之廣東兵一千名亦多患病現無應用之處交與原帶將脩張朝龍等帶領撤回本省至生番既知慕義自應廣示招徠民番等得以共慶

昇平相安無事臣曾遣熟悉番情之貢生張維光至番社曉諭酌令生番頭目數人照四川屯練土司之例進京瞻仰

天顏使化外蕃民優霑

聖澤而海疆荒僻之地咸得被服

聲教永慶敕寧茲據張維光稟報生番等極為欣悅情
願前往如蒙

俞允請俟天氣涼爽交與徐嗣曾妥協辦理派員帶領
於年前至京臣現在已無應辦之事即於五月初

九日由鹿耳門登舟初十日獲有順風揚帆行至
日暮抵黑水洋地方距澎湖內澳二十餘里風息

不能前進測量該處海水甚深碇索長至六七十丈總未沉底難以寄泊即在洋面往來飄蕩十二日午風浪大作竟夜不止船隻雖覺欹側幸而安穩無虞行程甚速十三日晚間至大擔門外溜逼山根礁石並未觸損船隻十四日由廈門港口登岸臣上年赴臺灣勦捕疊次被風吹回及徵調各兵到齊風色即為轉順自崇武澳放洋一帆即達鹿仔港兵船百餘號同時並到為從來未有之事

此次凱旋內渡途次雖遇風暴瀕危獲安此皆仰
賴我

皇上誠敬感孚

神明默祐並蒙

恩賜右旋白螺渡海得以益臻穩順登岸後即至廟拈
香瞻禮敬謝

神庥上年由崇武澳徑渡鹿仔港風帆恬利因於鹿
仔港寬廠處所恭建

天后廟宇今駐防兵丁等即在該處港口被風遇危
獲安疊徵靈異請將奉到

御書匾額交徐嗣曾即在鹿仔港新建廟內敬謹懸掛
現在巴圖魯侍衛及隨從官員俱已陸續到大擔
門一俟登岸後即起身前赴泉州與李侍堯會晤
將應行面商事件另行會摺具

奏至廈門一帶早禾現俱結穗顆粒充盈豐收可卜
現在糧價不昂民情極為歡慶奏入

上命軍機大臣傳諭福康安曰海洋風汛靡常五月間
向已多風福康安此次凱旋內渡雖遇風浪即獲安
穩行程順速其餘巴圖魯侍衛人等俱陸續登岸朕
心深為欣慰著賞給玉如意大小荷包以示優眷

上又諭內閣曰臺灣軍營出力人員歷經降旨著福康
安查明交部議叙茲據奏軍營出力之侍衛章京官
員將弁等現經秉公查核分別等第造冊咨部其應
行議卹之官弁兵丁等亦一併造冊送部著即照福

康安咨到各冊詳加核對除業經給與議叙卹典者毋庸再行議給外其餘俱著照福康安冊內所開照例議叙議卹又賊匪滋擾嘉義時教諭江浩巡檢吳元典史李爾和等俱各遇賊守禦身受重傷亦著該部一體照例議叙以示獎勵

上又諭內閣曰長庚湯大奎王雋早經降旨交部議卹所有縣丞周大綸陳聖傳教諭葉夢苓訓導陳龍池巡檢渠永謨張芝馨典史馮啟宗鍾燕超史謙平時

尚皆循分供職及賊匪滋事時又以身殉難殊堪憫
惻俱著交部照例議卹以示獎勵壽同春李喬基俱
著賞給知縣職銜並著該督撫等查明伊二人子嗣
內可以造就者候朕酌量加恩劉亨基之女滿姑雖
伊父居官玩縱以致釀成事端而其女抗節捐軀亦
不忍令其淹沒著交該部照例旌表並入該處烈女
祠以昭褒獎忠節不遺微末之意

臣等謹案崇獎忠貞所以為世道人心之勸我

皇上扶植綱常維持名教薄海咸曉然於大義匪獨守
土之責勵在臣僚即如壽同春李喬基者以流寓
之國學諸生猶能召集鄉民誓同殺賊至於酷羅
膊磔奮不顧身而劉滿姑以深閨弱質乃亦復輕
生重節視死如歸豈非

德教之入人者深歟

軫卹恩綸重申載錫

造就爰及於其嗣而俎豆不祧於其鄉猗歟盛矣所謂

崇獎忠貞者洵茂以加於此矣

欽定平定臺灣紀畧卷六十二